



**АКАФИСТ
СВЯТОМУ МУЧЕНИКУ ВОНИФАТИЮ**

Кондак 1

Избранный воине Христов, венцем славы украшенный,/ мученическую смертью вечная смерти избавивыйся,/ от мрака греховнаго отвративыйся и к вечному свету пришедый,/ прими моление наше, нами в похвалу тебе приносимое,/ и избави ны от сетей лукаваго врага нашего,/ да тебе с радостию зовем:// Радуйся, Вонифатие, мучениче многострадальный.

Икос 1

Ангелом светлым, огонь мучений твоих росую благодати угасившим, огражден был еси, страдальче Христов Вонифатие, да не когда яко грешник нераскаянный погибнеши и пред Господем в одежде мрачней предстанеши. Научи и нас облещися в светлыя ризы святости, тебе зовущих:

Радуйся, жизнь за Христа отдавый;
Радуйся, страданием Его подражавый.
Радуйся, очи своя к Богу обративый;
Радуйся, волю свою в добродетелех укрепивый.
Радуйся, рабе Христов верный;
Радуйся, святой конец жития своего приемый.
Радуйся, к покаянию сердца обращаяй;
Радуйся, ко Христу, Пути истинному, приводяй.
Радуйся, Духом Святым просвещенный;
Радуйся, соблазнами мира сего не прельщенный.
Радуйся, змия лукаваго посрамивый;
Радуйся, святых лик возвеселивый.
Радуйся, Вонифатие, мучениче многострадальный.

Кондак 2

Видя многомятежие мира сего и печали земныя, и сия вся яко прах вменив, к премирным возвел еси ум твой, страдальче Христов, на высоту Богоразумия возшед, Христа Бога пред всеми исповедал еси, и ныне души всех, во гресех погибающих, к милосердому Господу призываеши, да во смирении покаются и во слезах умиленных Ему вопиют: Аллилуйя.

Икос 2

Разум трезвением укрепил еси и страстей пламень покаянием угасил еси, Вонифатие предивный. От Запада на Восток из Рима пришел еси спострадати Господу Иисусу Христу, намерение святое нося, да благодать в тебе преизобилует, и нас ныне в храм Божий привлекл еси, тебе глаголющих:

Радуйся, страсти поборати научаяй;
Радуйся, отчаянным надежду спасения подаваяй.
Радуйся, суету жизни земныя познавай;
Радуйся, страдания своя предсказавый.
Радуйся, трезвящихся отрадо и удобрение;
Радуйся, немощных волею укрепление.
Радуйся, яко тобою от пианства отвращаемся;
Радуйся, яко тобою к Богу обращаемся.
Радуйся, исцелений источниче неисчерпаемый;
Радуйся, чудес сокровище неоскудеваемое.
Радуйся, научаяй нас присно возносити ум наш к Богу;
Радуйся, обретый истинную от грехов свободу.
Радуйся, Вонифатие, мучениче многострадальный.

Кондак 3

Сила милосердия Божия неизреченная на тебе открыся, яко жития твоего, мучениче, дивное повествование яве нам сказует, како велии грешницы милостивно Отцем нашим Богом приемлются, егда Ему покаяние приносят. Тако и ты Богу угодил еси и вместо горькия смерти вечную жизнь приял еси, научи и нас Богу пети выну: Аллилуйя.

Икос 3

Имея ныне радость вечную в Небесных селениих, и нас грешных на земли не забываеши, мучениче Христов Вонифатие. Мы же, труждающися и обремененнии, к тебе прибегаем: не остави сирых и недужных, помощи у тебе просящих, но мольбы наша на алтарь Небесный принеси, да радостно тебе зовем:

Радуйся, ближняго, яко себе самаго, возлюбивый;

Радуйся, во гресех сердце свое не ожесточивый.

Радуйся, странником и путником со всяким тщанием служивый;

Радуйся, сего ради нощию стогны града оставивый.

Радуйся, богатыя милосердию научаяй;

Радуйся, сирыя и вдовицы защищаяй.

Радуйся, бедствующим добрый предстателю;

Радуйся, за обидимых и унижаемых присный ходатаю.

Радуйся, нестерпимую жаждою пианства палимыя трезвением прохлаждай;

Радуйся, от винопития обнищавшия к трезвению призываяй.

Радуйся, жены рыдающия утешаяй;

Радуйся, слезы их ко Господу приносяй.

Радуйся, Вонифатие, мучениче многострадальный.

Кондак 4

Бури греховныя тебе не потопиша, ниже волны страстей покрыша, мучениче Христов, не погибл еси, но ко Христу пришел еси и жизнь свою, яко жертву благовонную, Ему, Сладчайшему Спасителю нашему, принесл еси. Молися убо, да и мы в житейшем мори сущии, к тихому пристанищу, Господу Спасителю, притецем, во умилении зовуще: Аллилуйя.

Икос 4

Яко глаголется во Евангельстей притчи, како блудный сын на стране далече имение свое иждив, от глада душевнаго в себе пришед, во объятия отча притече, в покаянии зовый: «Отче! Согреших на Небо и пред тобою», тако и ты, мучениче Вонифатие, не погубив себе, но от рожец греха отвратився, ко Христу обратился еси; мы же исправлению твоему радуящиеся, поем ти сице:

Радуйся, глад крепок в работе страстем испытавый;

Радуйся, Христа Бога, яко Хлеба Живаго, взалкавый.

Радуйся, пречистыя Крове Его, яко истиннаго питания, приобщивыйся;

Радуйся, яко преславным мучеником приложивыйся.

Радуйся, на крылех трезвения к Богу возлетевый;

Радуйся, сердце свое горе имевый.

Радуйся, ко Господу силою Животворящаго Креста пришедый;

Радуйся, яко приял еси венец победы.

Радуйся, душ наших сокровище нетленное;

Радуйся, Церкви наша украшение многоценное.

Радуйся, красоты мира сего отвергий;

Радуйся, греховную одежду с себе совлекий.

Радуйся, Вонифатие, мучениче многострадальный.

Кондак 5

Боготочную Кровь Христову, за всех нас недостойных, и кровь мученическую, за Христа пролиянную, памятующи, сице тебе вещаше Аглаида: «Сам веси, сколь многими грехи осквернены есмы и о будущем живота нашего небрежем. Аз же от божественнаго мужа слышала, яко мучеников мощи спасение даруют, иже мученика яко хранителя и ходатая пред Богом имут». И мы тебе глаголем: ты еси наш хранитель и ходатай пред Господем нашим, яко со Ангелы предстоиши Пресвятей Троице, поя: Аллилуйя.

Икос 5

Видим ныне и разумеем, како сии глаголы Аглаиды душу твою пробудиша, и ты к воздержанию призвал еси себе, мучениче Вонифатие, и нам помози подражати тебе, да не погибнем в пучине беззаконий потопляеми, но радостно тебе зовем:

Радуйся, от страстей, яко от погибельнаго сна, пробудивыйся;

Радуйся, от уз греховных свободивыйся.

Радуйся, сомневающихся в милосердии Божиим обличение;

Радуйся, безконечныя радости утверждение.

Радуйся, зовый нас к подвигу воздержания;

Радуйся, ты бо знамением креста посекал еси страстей взыграние.

Радуйся, стяжавый себе вечное имение;

Радуйся, и нас побуждаяй ко труду спасения.

Радуйся, яко винное веселие презрел еси;

Радуйся, плотския раны, яко безплотен, претерпел еси.

Радуйся, за исповедание Христа от врагов избиенный;

Радуйся, нестерпимым огнем за Него опаленный.

Радуйся, Вонифатие, мучениче многострадальный.

Кондак 6

Проповедница поклонения святым мощем явися Аглаида, госпожа твоя, страдальче Христов, егда посла тя на Восток святыя мощи мучеников, за веру Христову пострадавших, принести, имиже благодеяния источаются обильно и вечное спасение подается всем, к мученическому лику усердно притекающим. Дажь и нам утешение от Господа прияти, Емуже Ангельскую песнь приносим: Аллилуйя.

Икос 6

Возсиял еси нам, яко звезда незаходимая, дивным житием твоим, мучениче преблаженне, иго Христово легкое и вседрагое на себе приемый и спасение получивый, пути бо благочестия без Христа Господа обрести никакоже возможно есть, темже и нас молитвами твоими в горния обители приведи, тя восхваляющих сице:

Радуйся, закона Христова скрижаль, Богом начертанная;
Радуйся, молитв к Господу миро благоуханное.
Радуйся, веры Христовой столпе огненный;
Радуйся, честный венче заповедей Божиих, яко камен драгих, устроенный.
Радуйся, трезвения лестнице, в Небо восходная;
Радуйся, болезни и раны врачуяй греховныя.
Радуйся, от Господа Иисуса благодать и силу приял еси;
Радуйся, сего ради в лице мученичеством просиял еси.
Радуйся, воздержанием от грехов освящати праздники нас научаяй;
Радуйся, от смертнаго вина нас охраняяй.
Радуйся, умерщвленныя страстьми светом Христовым оживляяй;
Радуйся, к новому житию призываяй.
Радуйся, Вонифатие, мучениче многострадальный.

Кондак 7

Хотя отыти от дому своего в путь на Восток, кончину жития твоего предрекл еси, достохвальне, Аглаиде глаголя: «Госпоже моя, прими мое тело, за Христа мучимое, егоже принесут ти». В души твоей мысль за Христа пострадати тая, Емуже откровенно молился еси; и нашу веру укрепи, да будем готовы и мы ея ради страдати, Господу поюще: Аллилуйя.

Икос 7

Дивному и преславному исправлению твоему не веруя, помысли лукавое в сердца своем Аглаида, грехом бо хуления оболгати тя хотящи, тако отвеща ти: «Ныне не глумления время, брате, но благоговения, ведый буди, яко мощи святых имаши носити. Господь же да послет Ангела Своего пред тобою и направит стопы твоя милосердием Своим». Мы же чистоту сердца твоего, дивный Вонифатие, зряще, вопием ти:

Радуйся, святых мощей почитателю;

Радуйся, пред Господем и Материю Его за нас предстателю.

Радуйся, безчинств хранитися нам повелевый;

Радуйся, вся, о нихже сынове века сего радуются, презреый.

Радуйся, известный нам помощниче;

Радуйся, святых мыслей таинниче.

Радуйся, всем борющимся с грехами покровителю;

Радуйся, покаяния нашего пред Богом поручителю.

Радуйся, яко твоими молитвами Господь оставляет прегрешения;

Радуйся, помогаяй нам терпети скорби и поношения.

Радуйся, ликом Ангельским сотворивый удивление;

Радуйся, духов злобы приведый в посрамление.

Радуйся, Вонифатие, мучениче многострадальный.

Кондак 8

Странно тебе бысть языческое идолом служение, и ты, святыи мучениче, в Тарс пришед, не преклонил еси колен пред богами чуждими, но Апостолом показался еси ревнитель. Темже молися за ны, да возгоримся и мы огнем любви ко Владыце Христу, поюще выну: Аллилуйя.

Икос 8

Весь распалился еси ревностию святою, хуления на Господа не терпя, и исполнился еси Духа Божия, ослепление и безумие поклоняющихся ложным богам обличая. Сего ради царь нечестивый казнь наведе на тя, мучениче, горькую, бичми нестерпимо бия и раны нанося неисцельныя. Мы же похвалу поем:

Радуйся, зловерия обличителю дерзновенный;
Радуйся, в правду Божию, яко броню, облеченный.
Радуйся, яко кости твоя за Христа обнажахуся;
Радуйся, чистота души твоя тогда открывашеся.
Радуйся, яко наследовал еси Небесная селения;
Радуйся, яко и ныне обличаеши злых человек на Христа хуления.

Радуйся, за Христа острыми тростями прободаемый;
Радуйся, сада райскаго цвете неувядаемый.
Радуйся, яко злато, горнилом язв очищенный;
Радуйся, за Христа убиенный.
Радуйся, кончиною своею Богу угодивый;
Радуйся, даже до смерти мученичестей Его возлюбивый.
Радуйся, Вонифатие, мучениче многострадальный.

Кондак 9

Всего себе Господу Богу предаде, страстотерпче Христов, егда нечестивый царь повеле раскрыти уста твоя и олово кипящее влити. Руце своя воздвигл еси к небу, тако моляся: «Господи, Боже мой, Иисусе Христе, укрепивый мене в муках, пребуди и ныне со мною, моя страдания облегчи и не остави мене одолену быти лукавым князем». Тем и нас любви ко Христу научаеши, поющих Богу: Аллилуйя.

Икос 9

Витии суемудрении да не рекут нам: олово бо разженое гортани твоя не опали, ниже иного вреда тебе сотвори, мучениче Вонифатие; от Господа бо знамение победы над мучителем просил еси, и сие знамение тебе дано бысть. Сего ради вси чудящиися восклицаху: «Велий еси Иисусе Христе, веруем в Тя, Господи». Мы же славим тя, мучениче, сице:

Радуйся, яко тобою вернии просвещаются;
Радуйся, яко тобою от постыдныя смерти избавляются.
Радуйся, во едином Христе утешение полагая;
Радуйся, во страданиих призывати Бога нас научая.
Радуйся, яко мучителие тебе не превозмогоша;
Радуйся, яко страсти тебе не побороша.
Радуйся, ты бо терния грехов в себе попалил еси;
Радуйся, ты бо огнем неопален пребыл еси.
Радуйся, присно живой страстотерпче радостный;
Радуйся, источниче неисчерпаемая благодати.
Радуйся, яко помощию твоею печали на радость прелагаются;
Радуйся, яко подвигом твоим пути наша освещаются.
Радуйся, Вонифатие, мучениче многострадальный.

Кондак 10

Спасен быти восхотев, пламенне возжелал еси до конца за Господа пострадати, мучениче Вонифатие, Емуже и возопил еси: «Господи, Господи, Боже мой, сподоби мя милостей Твоих и буди ми помощник, да за беззакония моя, безумно содеянная, враг не преградит ми пути к Небеси, прими с миром душу мою, прими мя с мучениками, кровь за Тя пролившими и веру до конца соблюдшими», мы же сице вопием: Аллилуйя.

Икос 10

Стена крепкая, козными врага не одоленная, пребыл еси до конца, мучениче Христов. Егда же глава твоя от телесе отсечена бысть, о чудесе! Абие кровь и млеко из раны твоя истечаста, яко да неверным, чудо сие зрящим, Христа прославити и с нами звати тебе:

Радуйся, яко мучения твоя зряще, множество людей ко Христу обратишася;

Радуйся, яко тебе ради на князя злобы они устремишася.

Радуйся, твоя бо кончина просвети умы помраченныя;

Радуйся, твоя бо славная смерть воскресит совести во гресех погребенныя.

Радуйся, нераскаянных грешников обличение;

Радуйся, расслабленных от вина исцеление.

Радуйся, в нощи неведения блуждающим вразумление;

Радуйся, золотая удице, из глубины грехов влекущая ко спасению.

Радуйся, яко от Бога в молитвах услышан был еси;

Радуйся, яко в Небесном Царстве воцарился еси.

Радуйся, в порфиру от кровей твоих облеченный;

Радуйся, яко зриши ныне свет неизреченный.

Радуйся, Вонифатие, мучениче многострадальный.

Кондак 11

Пение немолчное приносиши Господеви, мучениче Вонифатие, с мученическими лики Пресвятей Троице предстоя, за Нюже себе предал еси, да и мы души своя, аки невесты украсивше, нетленному Жениху Христу представим со священной песнию: Аллилуйя.

Икос 11

Свет любви и по смерти возсиял еси, Вонифатие дивный, егда бо друзи, твою усеченную главу обретше, плакахуся горько, глаголюще: «Рабе Христов, забуди нам грех неправеднаго осуждения и безрассудных руганий наших». Тогда лик твой, яко лучами живыми, просветися, прощения им являя. Сего ради с любовью тебе зовем:

Радуйся, имеяй уста кротости сладковещанная;
Радуйся, любви вместилище пространное.
Радуйся, о тебе бо веселится Церковь со своими чады;
Радуйся, ты бо пришел еси к Вышнему Небесному граду.
Радуйся, в смерти своей Апостолом равный;
Радуйся, ревностию по Бозе преславный.
Радуйся, житейския молвы обличаяй злые сплетения;
Радуйся, всех нас от вражия избавляяй явления.
Радуйся, ты бо защищаеши неправедно гонимыя;
Радуйся, пред престолом Господним лампадо
неугасимая.
Радуйся, по заповеди Христовой врагов любивый;
Радуйся, злословие и клеветы позабывый.
Радуйся, Вонифатие, мучениче многострадальный.

Кондак 12

Благодать исцелений точащая мощи твоя, егда к Риму приближахуся, Ангел Господень явися Аглаиде, глаголя: «Бывшаго ти древле раба, ныне же нашего брата и сослужебника приими, якоже владыку, и упокой добре, да греси твои оставятся, той бо с нами ныне в Небесех поет Всевышнему: Аллилуйя».

Икос 12

Поюще чудеса твоя, храм дивный созда тебе, воине Христов, Аглаида, в немже и мощи твоя положи, и сама, богатство нищим раздавши и пятьдесят лет в подвизах поста и покаяния поживши, лика святых достиже. Темже, величающе чудеса твоя, славим тя сице:

Радуйся, душу твою сотворивый храм Богу прекрасный;

Радуйся, чудных Божиих дел книга ясная.

Радуйся, от внезапныя смерти избавляяй;

Радуйся, скорбныя жены злых пианиц ограждаяй.

Радуйся, падшия к возстанию от грехов призываяй;

Радуйся, свет чистоты им подаваяй.

Радуйся, ты бо укрощаеши страстей огневицу;

Радуйся, тобою бо оставляем греховную темницу.

Радуйся, малая чада от соблазнов мира соблюдаяй;

Радуйся, Христову учению наставляяй.

Радуйся, вестниче трезвости, во веки прославленный;

Радуйся, угодниче Христов, присно почитаемый.

Радуйся, Вонифатие, мучениче многострадальный.

Кондак 13

О преславный мучениче Христов Вонифатие,/ приими от нас сие малое похвальное приношение,/ еже пред иконою твою, колена преклоньше/ и руке свои к тебе простерше, тебе ныне приносим:/ даруй нам твое пред Господем заступление,/ наипаче же погибающим от пианства братьям нашим./ Исцеление низпосли, жития благаго начало положити всех нас сподоби/ да спасение улучивше молитвами твоими, во веки восхвалим Бога, поюще Ему:// Аллилуйя.

Сей Кондак чтется трижды. И паки чтутся:

Икос 1

Ангелом светлым, огонь мучений твоих росю благодати угасившим, огражден был еси, страдальче Христов Вонифатие, да не когда яко грешник нераскаянный погибнеш и пред Господем в одежде мрачней предстанеш. Научи и нас облещися в светлыя ризы святости, тебе зовущих:

Радуйся, жизнь за Христа отдавый;
Радуйся, страданием Его подражавый.
Радуйся, очи своя к Богу обративый;
Радуйся, волю свою в добродетелех укрепивый.
Радуйся, рабе Христов верный;
Радуйся, святой конец жития своего приемый.
Радуйся, к покаянию сердца обращающий;
Радуйся, ко Христу, Пути истинному, приводящий.
Радуйся, Духом Святым просвещенный;
Радуйся, соблазнами мира сего не прельщенный.
Радуйся, змия лукаваго посрамивый;
Радуйся, святых лик возвеселивый.
Радуйся, Вонифатие, мучениче многострадальный.

Кондак 1

Избранный воине Христов, венцем славы украшенный,/ мученическую смертью вечная смерти избавившись,/ от мрака греховного отвратившись и к вечному свету пришедый,/ приими моление наше, нами в похвалу тебе приносимое,/ и избави ны от сетей лукавого врага нашего,/ да тебе с радостью зовем:// Радуйся, Вонифатие, мучениче многострадальный.

Молитва ко святому мученику Вонифатию

О многострадальный и всехвальный мучениче Вонифатие! Ко твоему заступлению ныне прибегаем, молений нас, поющих тебе, не отвержи, но милостиво услыши нас. Виждь братию и сестры наша, тяжким недугом пианства одержимыя, виждь того ради от матере своя, Церкви Христовой, и вечного спасения отпадающия. О святой мучениче Вонифатие, коснися сердец их данною ти от Бога благодатию, скоро возстави от падений греховных и ко спасительному воздержанию приведи их. Умоли Господа Бога, Егоже ради страдал еси, да простив нам согрешения наша, не отвратит милости Своея от сынов Своих, но да укрепит нас в трезвении и целомудрии, да поможет Своею десницею трезвящимся спасительный обет свой до конца сохранить во дни и нощи в нем бодрствующе, и о нем добрый ответ на Страшном Судищи дати. Приими, угодниче Божий, молитвы матерей, о чадах своих слезы проливающих; жен честных, о мужах своих рыдающих, чад сирых и убогих, от пианиц оставленных, всех нас, к иконе твоей припадающих, и да приидет сей вопль наш молитвами твоими ко престолу Всевышняго даровати всем по молитвам их здравие и спасение душ и телес, наипаче же Царство Небесное. Соблюди нас от лукавого уловления и всех козней вражиих, в страшный же час исхода нашего помози

прейти непреткновенно воздушная мытарства и молитвами твоими избави вечнаго осуждения. Умоли же Господа даровати нам к отечеству нашему любовь нелицемерную и непоколебимую, пред врагами Церкви Святыя видимыми и невидимыми, да покрывает нас милость Божия в нескончаемыя веки веков. Аминь.

Молитва от пьянства и всякой страсти

Спаси, Господи, и помилуй рабов твоих словесами Божественнаго Евангелия Твоего, чтомыми о спасении рабов Твоих сих (*имярек*). Попали, Господи, терние всех согрешений их, вольных и невольных, и да вселится в них благодать Твоя, просвещающая и очищающая всего человека во имя Отца и Сына и Святаго Духа. Аминь.

Читать главу 15 Евангелия от Иоанна ежедневно.

Краткое житие святого мученика Вонифатия

Святой мученик Вонифатий был рабом богатой молодой римлянки Аглаиды и состоял с ней в беззаконном сожительстве. Они оба чувствовали угрызения совести, хотели как-то загладить свой грех, и Господь пожалел их — дал им возможность покаяться. Аглаида узнала, что если с благоговением хранить в доме мощи святых мучеников, то их молитвами можно получить спасение. По ее просьбе Вонифатий отправился на Восток, где в то время шло жестокое гонение на христиан, чтобы привезти мощи какого-нибудь мученика. На прощание он, смеясь, спросил: "А что, госпожа, если я не найду мощей, а сам пострадаю за Христа, примешь ли ты мое тело с честью?" Аглаида отнеслась серьезно к его словам и укорила своего раба в том, что, отправляясь на святое дело, он позволяет себе вольности. Вонифатий задумался и все время пути о чем-то размышлял.

Приехав в Киликию, в город Тарс, Вонифатий оставил в гостинице своих спутников и пошел на городскую площадь, где мучили христиан. Здесь он был потрясен зрелищем страшных пыток. Видя просветленные благодатию лица святых мучеников, Вонифатий бросился к ним, целовал им ноги и просил их святых молитв, чтобы и ему удостоиться пострадать с ними. На вопрос судьи, кто он, Вонифатий ответил: "Я христианин", — и отказался принести жертву идолам. Его тут же предали на мучения: били так, что мясо отпадало от костей, вонзали иглы под ногти, вливали в горло расплавленное олово, — но силой Господней Вонифатий остался невредим. Окружавшие судилище люди пришли в возмущение, стали бросать в судью камни, а затем устремились к языческому капищу, чтобы низвергнуть идолов. На следующее утро, когда волнения несколько затихли, судья распорядился бросить святого мученика в котел с кипящей смолой, но и это не причинило страдальцу никакого вреда: его оросил сошедший с Небес ангел, а смола вылилась из котла, вспыхнула и обожгла самих мучителей. Святой Вонифатий был приговорен к усечению мечом. Когда ему

отрубили голову, из раны истекли кровь и молоко; видя такое чудо, около 550 человек уверовало во Христа.

Между тем спутники святого Вонифатия, напрасно прождав его два дня в гостинице, стали его разыскивать, предполагая, что он предался легкомысленному времяпрепровождению. После долгих поисков они встретили человека, бывшего очевидцем мученической смерти святого. Он привел их на то место, где еще лежало обезглавленное тело страдальца. Спутники святого Вонифатия со слезами просили у него прощения и, выкупив за большие деньги останки мученика, привезли их в Рим.

Накануне их прибытия Аглаиде во сне явился ангел и повелел ей приготовиться встретить бывшего раба ее как господина и покровителя. Аглаида призвала клириков и с великим почетом приняла мощи мученика Вонифатия к себе в дом. Со временем она построила храм во имя святого и положила там честные мощи, прославившиеся множеством чудес. Раздав нищим все свое имение, она удалилась в монастырь, где провела в покаянии восемнадцать лет и еще при жизни прославилась даром изгонять нечистых духов.

Память святого мученика Вонифатия совершается 19 декабря (1 января).